

## 【粽仔个味緒】張美容原作

偲兜客人，一年裡肚就五月節撈七月半正綑粽仔，偲從細就好食糯米氣，故所望毋得到這食粽仔个節日。毋過三、四年來，吾姆毋會綑粽仔咧，節日旨得時到，偲就滿哪仔去尋，看哪位有阿姆味緒个粽仔好買，尋去尋轉，總試著逐位賣个粽仔食起來都無阿姆包个恁香恁好食。想真還係愛怪自家，仰會就知好食，毋知好撈阿姆个手路學起來！

吾姆降有六個細人仔，在頭擺無恁豐湧个時代，節日旨到，隻隻就念等愛食板仔咧，吾姆惜子，為著滿足細人仔，麼个板就會打。記得包粽仔過節該下，雖然天時熱，佢還係毋驚麻煩，板粽、米粽、煨粽項項包。該時个細人仔當好供<sup>1</sup>，麼个都食落一肚。到偲兜較大兜仔，就開始嫌板粽、煨粽無恁好食，長下愛吾姆鬥當正刻耐仔食兜仔，慢慢仔吾姆就伸著包米粽定定。

有一擺，吾姆聽人講，粽仔裡肚落焯<sup>2</sup>過个豆腐乾撈切角个綠竹筍較好食，佢也跔等做。無想著加這兩項東西落去，粽仔嘎毋

耐放，當遽就牽絲壞忒哩，過後佢就盡少用咧。又有一擺，佢毋知哪聽來，講粽仔裡背包蚵仔乾味道加盡好，佢又跔等做，這擺係精食个吾爸開嘴咧，佢額結結仔講：「放蚵仔乾落去，歸隻粽仔變恁臭臊，尤其冷忒食還較得人驚！」就恁樣仔，包蚵仔乾个粽仔就無再過出現咧。過後，吾屋下个粽仔本本係米炒香，裡背包蘿蔔乾、豬肉、香菇，單單純純，大家最慣个口味。

吾爸好食甜，下把仔會唸：「恁熱个天，係有冰冷冷个煨粽來食，毋知幾好哪！」因為細人仔毋食，吾姆就無願頭<sup>3</sup>包咧。有一日，偲在市場看著有人賣裡背包紅豆餛<sup>4</sup>个煨粽，想這毋使另外去買白糖來搵，當自然食，就暢靈靈仔<sup>5</sup>買一擲轉去，無想著吾爸一落嘴就講：「還係偲兜傳統个煨粽較好食。」就像偲頭擺買煮燒酒雞个漢藥包轉去分佢煮雞酒共樣，佢也一食就講：「還係偲俚客人單淨用雞肉煮酒較好食，毋使恁多話話霸霸<sup>6</sup>。」

經過恁多擺經驗，分偲最大个感想就係：麼个東西加忒多花草草未必就係好。人生乜共樣，總愛熱天時有涼風好吹，春天時有百花好看；秋天時有明亮个月光，寒天時有燒暖个冬陽，就恁樣簡簡單單，就係好、就係幸福！

---

<sup>1</sup> 當好供：音 dong' ho` giung；很好養。

<sup>2</sup> 焯：音 biag；乾煎。

---

<sup>3</sup> 願頭：音 ngien teu`；意願。

<sup>4</sup> 紅豆餛：音 fung` teu a'；紅豆做成的餡。

<sup>5</sup> 暢靈靈仔：音 tiong lag lag e`；很高興。

<sup>6</sup> 話話霸霸：音 va va ba ba；噓頭。